

Rapport dalla sessiun dil cussegl da vischnaunca dils 14-11-2022

Tractanda 1

Approbaziun dil protocol dalla sessiun dils 17-10-2022

Il protocol dalla sessiun dils 17-10-2022 vegn approbaus cun engraziament.

Tractanda 2

Elecciuns dil biro dil cussegl

Per igl onn d'uffeci 2023 vegnan las suandontas personas elegidas:

- a) Presidenta dil cussegl:
Flurina Bundi

- b) Vicepresident dil cussegl:
Bruno Pfister

- c) 2 dumbravuschs
Clemens Bundi
Wendelin Decurtins

- d) 2 suppleants da dumbravuschs:
Baseli Tomaschett
Flavio Tuor

- e) Actuara:
Rita Wolf

Tractanda 3

Damonda dalla fundaziun Cuort Ligia Grischa per ina contribuziun da frs. 120'000.- vid la restauraziun dalla fatschada dil museum Cuort Ligia Grischa

La fatschada dalla Cuort Ligia Grischa basegna ina restauraziun. La davosa restauraziun ei gia passa trenta onns anavos e specialmein ils barcuns da l'enn ch'eran buca vegni sanai da quei temps ein en in schliet stadi. La sostanza architectonica preziosa che stat sut protecziun da monuments duei vegnir mantenida ed igl edifices duei splendurar igl onn da giubileum 2024 «600 onns Ligia Grischa» en nova tarlischur.

Ils cuosts totals per la restauraziun muntan a frs. 390'000.-. Il baghetg Cuort Ligia Grischa ei integras egl Inventari federal svizzer dils maletgs dil vitg ch'ei digns da vegnir protegi (ISOS), aschia che la tgira da monuments dil Grischun sco eventualmein era la Confederaziun separticipeschan cun subvenziuns. La fundaziun communizeivla Cuort Ligia Grischa po ord atgna forza denton buca financiar cumpleinamain il grond ed impurtont project ed ei dependenta d'ulteriuras contribuziuns dil maun public, da prestaziuns da tiazas personas e da donaziuns. Ella damonda la vischnaunca per ina contribuziun da frs. 120'000.-.

Cun 12 : 0 vuschs conceda il cussegl da vischnaunca il credit da frs. 120'000.- per la sanaziun dalla fatschada dalla Cuort Ligia Grischa, cun resalva dil referendum facultativ (art. 19 alinea b costituziun communal).

Tractanda 4

Fixaziun dil pei da taglia per igl onn 2023

Dapi igl onn 2012 ha la vischnaunca da Trun in pei da taglia da 105 pertschien.

La fiera d'energia ei actualmein fetg favoreivla per la vischnaunca da Trun che posseda 2.625 pertschien dallas aczias dallas ovras electricas Reinanteriur (ORA). Fertion che la vischnaunca profitescha da varga 3 milliuns dapli entradas, pagan ils privats entuorn 30% dapli per l'energia. La suprastanza communal vul dar anavos zatgei al pievel ed ei dil meini ch'in sbassament dil pei da taglia per 10% seigi indicaus. La cumissiuon da gestiun sustegn quei sbassament.

Il cussegl propona cun 12 : 0 vuschs per mauns dalla radunonza da vischnaunca da fixar la taglia communal per igl onn 2023 sin 95% dalla taglia cantunala sempla.

Tractanda 5

Preventiv 2023

President communal Dumeni Tomaschett informescha ch'il preventiv dil quen da gudogn e sperdita 2023 siara cun in surpli d'entras da frs. 2'749'000.-. Il gudogn avon amortisaziuns munta à frs. 3'225'800.-. Il quen d'investiziuns preveda investiziuns nettas da frs. 2'929'000.-. Aschia seresulta in surpli da finanziaziun da frs. 296'800.-.

La canzlista communal presenta il preventiv dil quen da gudogn e sperdita en detagl.

Las impurtontas posiziuns el preventiv d'investiziuns secumponan ord:

3290.5290.00	Fiasta 600 onns Ligia Grischa	frs.	150'000.00
3290.5660.00	Contribuziun restauraziun fatschada Cuort Ligia Grischa	frs.	120'000.00
6150.5010.05	Via Campliun – Caltgadira	frs.	1'270'000.00
6150.5010.06	Via Pustget	frs.	415'000.00
6150.5010.90	Sanaziun illuminaziun publica (project viafier)	frs.	150'000.00
6190.5060.00	Maschina communal	frs.	240'000.00
7301.5030.00	Sanaziun deponias da rumians	frs.	100'000.00
8205.5010.04	Via Nadels – Rost	frs.	1'000'000.00

Il cussegl decida cun 12 : 0 vuschs da proponer per mauns dalla radunonza da vischnaunca d'approbar:

- **il preventiv dil quen da gudogn e sperdita che siara cun entradas da frs. 10'863'400.- ed expensas da frs. 8'114'400.-, pia cun in surpli d'entras da frs. 2'749'000.-**
- **il preventiv dil quen d'investiziuns che siara tier expensas da frs. 3'720'000.- ed entradas da frs. 791'000.- cun in surpli d'expensas da frs. 2'929'000.-.**

Tractanda 6

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Mario Lechmann

La actura
Sandra Gautschi